

14 -Дәріс

Тақырыбы: Функцияның ең үлкен және ең кіші мәндері. Функция графигінің ойыс, дөңес аралықтары. Иілу нүктелері.

Функциялардың кесіндідегі ең үлкен және ең кіші мәндері

$[a, b]$ кесіндісінде үзіліссіз f функциясының ең үлкен (ең кіші) мәнін табу керек болсын. Оның қандай да бір $x_0 \in [a, b]$ нүктесінде болатыны белгілі.

Ендеше тек келесі үш жағдай болуы мүмкін:

$$1) x_0 = a, \quad 2) x_0 = b, \quad 3) x_0 \in (a, b).$$

Егер $x_0 \in (a, b)$ болса, онда x_0 – локальді экстремум нүктесі екені түсінікті.

Егер x_1, x_2, \dots, x_m - күдікті нүктелер, онда

$$\begin{aligned} \max_{x \in [a, b]} f(x) &= \max \{f(a), f(b), f(x_1), \dots, f(x_m)\} \\ \min_{x \in [a, b]} f(x) &= \min \{f(a), f(b), f(x_1), \dots, f(x_m)\}. \end{aligned} \quad (3)$$

Функцияның дөңестігі. Иілу нүктелері

$f(x)$ функциясы J – аралығында берілсін.

Анықтама. Егер $f(x)$ – тің графигінің кез келген $A_1(x_1, f(x_1))$ және $A_2(x_2, f(x_2))$ екі нүктесінің арасындағы доға осы доғаны керетін хордадан жоғары жатпаса, онда $f(x)$ – функциясы J аралығында **дөңестігі төмен бағытталған, қысқаша, ойыс функция** деп аталады.

Егер $g(x) = -f(x)$ функциясы J аралығында ойыс болса, онда $f(x)$ – функциясы J аралығында **дөңестігі жоғары бағытталған, қысқаша дөңес функция** деп аталады. Әрине $f(x)$ ойыс функция болса, онда $-f(x)$ дөңес болады.

Теорема-1. Егер $f(x)$ функциясының J аралығында туындысы бар болса, онда $f(x)$ **ойыс (дөңес) функция** болу үшін $f'(x)$ функциясы аралығында **кемімейтін (өспейтін) функция** болуы қажетті және жеткілікті.

$f(x)$ функциясының J аралығында екінші ретті туындысы бар болса, онда $f'(x)$ функциясы J аралығында **кемімейтін (өспейтін) болуы** $x \in J, f''(x) \geq 0$ ($x \in I, f''(x) \leq 0$) шарттарымен пара-пар болғандықтан, келесі теоремаға келеміз.

Теорема-2. Егер J аралығында $f(x)$ функциясының екінші ретті туындысы бар болса, онда $f(x)$ **ойыс (дөңес) функция** болуы үшін әрбір $x \in J$ үшін $f''(x) \geq 0$ ($f''(x) \leq 0$) теңсіздігі орындалуы қажетті және жеткілікті.

Ойыс (дөңес) функциялардың геометриялық сипаты келесі теоремадан көрінеді.

Теорема. $f(x)$ (a, b) - аралығында дифференциалданатын функция болса, онда $f(x)$ - **ойыс (дөңес) функция** болуы үшін, оның графигі өзінің әрбір жанамасынан **төмен (жоғары) жатпауы** қажетті және жеткілікті.

Анықтама. $f(x)$ функциясы (a,b) аралығында анықталған және үзіліссіз болсын. Егер $x_0 \in (a,b)$ нүктесінің белгілі бір оң және сол жақты маңайларында $f(x)$ функциясының дөңестігі қарама-қарсы бағытталған болса, онда $(x_0, f(x_0))$ нүктесі $f(x)$ - тің графигінің **иілу нүктесі** деп аталады.

Теорема-3 (иілу нүктесінің қажетті шарты). (a,b) аралығында $f(x)$ дифференциалданатын, ал x_0 - нүктесінде екінші ретті туындысы $f''(x_0)$ бар функция болсын. Егер $(x_0, f(x_0))$ иілу нүктесі болса, онда $f''(x_0) = 0$.

Теорема-4 (иілу нүктесінің жеткілікті шарты). Егер $f(x)$ функциясы x_0 нүктесінің белгілі бір δ - маңайында үзіліссіз болып, $(x_0 - \delta, x_0)$ аралығында туындысы бар және ол кемімейтін (өспейтін), $(x_0, x_0 + \delta)$ аралығында туындысы бар және ол өспейтін (кемімейтін) болса, онда $(x_0, f(x_0))$ - иілу нүктесі.

Басқаша айтқанда, $(x - \text{өсу бағытында})$ x_0 - нүктесінен өткенде $f''(x)$ - екінші ретті туындының таңбасы өзгерсе, онда $(x_0, f(x_0))$ - иілу нүктесі болады.

Сонымен, функцияның иілу нүктелерін тек қана $f''(x_0) = 0$ орындалатын немесе $f''(x)$ - болмайтын нүктелердің (ондай нүктелерді **функцияның екінші ретті күдікті нүктелері** деп те атайды) ішінен іздеу керек.